



20. august 2021

UKA 2020/162

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Nipilersortartut immiussinissamut 10.000 kr.tikillugu tapiissummik misiliutaasumik 2022-miit augustip aallaqqaataani atuutilersussamik Naalakkersuisut pilersitseqqullugit Inatsisartut aalajangiiffissaattut siunnersuut. Katillugu ukiut marluk ingerlaneranni 300.000 kr.-nik aningaasalerneqassaaq, Nunatsinni nipilersukkanik saqqummersitsisarnerup siuarsarmissaanik siunertalimmik. Misilittagaalersimasut nalilersuinissamut atorneqassapput avammut tunisassiornikkut kiisalu eqqumiitsuliornikkut siuariarsimanermut sunniuteqarsimanersut.

(Inatsisartunut ilaasortaq Aqqalu C. Jerimiassen, Atassut)

Tungavilersuut

Nipilersortartup kissaataa annerpaaq suua? Tassaavoq tusarnaartoqarluni appisimaarnissaq, kiisalu immiussinissaq. Ullutsinni saqqummersitsiniarneq ajornartorujussuuvoq tusaamasaariinngikkaanni, allanartumillu nipilersoriaaseqaraanni.

Nipilersukkat eqqumiitsuliat nunatsinni tunisaanerat annikitsuarsuuvoq. Uagummi Kalaallit tusaruminartunnguit ilisarnartunnguillu pisiariumanerusaratsigit. Taamaattumillu saqqummersitsiniarnermi akilersinnaasutuaasarlutik.

Eqqumiitsuliatullu allanartunik nipilersugassiat tassaapput nunatta avataaniit soqutigineqarluarsinnaasut annerpaartaat ilaat. Assersuutigiinnarlugumi Island, Savalimmiut aamma Danmarkimi nipilersugassiorlut nunagisap avataani ingerlalluarnerpaasutut isigineqartut tassaasarpud eqqumiitsulianik erinniortut taalliortullu.

Nipilersorneq, saqqummersitsisarnerlu nunatsinni siuarsassagutsigu, nunanut allanut unammillersinnaanerulernarluta, pitsaassutsikkut qaffassaaqataasariaqarpugut tapersersuinerullutalu. Nipilersorneq sunngiffimmi sammisassatut isigiunnaartariaqarparput, annerusumillu inuussutissarsiutitut, nunattalu avataanut tunisassiassatut piorsartariaqarlutigu.

Pikkorissorsuarnik piginnaasalinnillu nipilersortartoqarpugut, nukiummat annertoorsuarmik suli atorluanngisarpud. Paaserusupparput qanoq tapeeriaasitsinni qanoq tulluunnerusumik naapertuunnerusumillu sulissuteqarsinnaanerluta, siammasinnerusumillu atuussinnaatitsisumik.



Taamaalillunilu nipilersortartut ukunani pioreersuni qinnuteqarlutik itigartussaagaluartut, soorlu Kultoorisiornikkut aningaasaliissutaasartuniit. Kiisalu saqqummersitserusullutik saqqummersitsivinnut ikittunnguusunut saaffiginnittuartarsimagaluarlutik itigartarsimagaluartut nammineerlutik periarfissarsiorlutik suliaqarsinnaalernissaat anguniarlugu.

Massakkut saqqummersitsiviusuni anginerpaasoq qinnuteqarsinnaasarpog, saqqummersitassanullu inaarinnissinnaarusullutik taperneqartarlutik. Taakkulu saqqummersitsivikkut immiunneqartartut qaffasissumik pitsaassuseqarnissaq siunertarlugu immiussisarfivimmi nipiliorfiusinnaasumilu immiunneqartarput, ilinniarsimasunik pikkorissunillu immiussisulerlutik. Tamakkiisumillu taamatut suliaqarneq aningaasarpajussuarnik naleqartarluni. Taamaakkaluartorli saqqummersitsisarnerat imminut akileqqarluinnartarluni. Nipilersortartullu tassangaanniit saqqummersitsisinnaasartut ikittuarannguullutik.

Nipilersortartut nalunngilaat qanoq ajornarluinnartiginersoq Kultoorikkut aningaasaliissutiniit taperneqassalluni. Kodamiillu taperneqarnissaq aamma ajornakusoortarpoq qinnuteqartut amerlasangaarmata, ukiumullu 100.000 kruuniinnaat agguanneqartarlutik.

Nipilersortartut nalunngilaat nipilersortartunut CVR atorfissaqanngitsoq. Nipilersorfinniit aqqissuisut CVR atoqquneq ajorpaat. Bandiullunilu CVR-qarnissaq aamma iluaqutaanngilaq nipilersoqatigiit allanngoqattaartarmata. Nipilersortartullu ataasiakkaarlutik CVR normoqassagunik, assersuutigalugu nipilersoqatigiinni arfineq marluusuni fakturat arfineq marluk aqqissuisumut nassiuunneqartariaqassallutik.

Nipilersortartunut CVR atorfissatuaq tassaavoq qinnuteqarfissaq ataaseq, annertuumik projekteqarluni, nittarsaanermut, nunarsuarluunniit tamakkerlugu angalaarniassalluni aningaasarpassuarnik qinnuteqarfissaq.

Nipilersortartullu nalunngilaat annikitsumik qinnuteqarfissamik annertuumik pisariaqartitsineq annertusoq. Assersuutigalugu annikitsumik tapiiffiusinnaasoq 10.000 kr missaani. Taakkulu immiussisup suliarinnittulluunniit akissarsinissaanut atorneqarsinnaassallutik, immaqaluunniit immiussisarfimmik inimilluunniit attartornissamut akiliutissatut, illoqarfigisami nunaqarfigisamiluunniit. Tumerparpaat allallu nipilortussanut immiussiniarnermut ini tulluartoq aamma pisariaqarsinnaasarpog, immaqaluunniit mixerisussamut masteriisussamullu (nipigissaasussanut). Immiussinermilu saqqummersitsinissamut pisariaqarluinnartut pinngitsoorneqarsinnaanngitsut arlaqarput. Soorlu digitaliusunut ikkussuiniarnermi akiliutissaq, Spotify-uppat iTunesiuppalluunniit, aammalu soorunalimi aamma cd-nik naqiterisitsiniarnermi.

Sineriak tamakkingjavillugu immiussisarfeeraatillit amerlaqaat. Sumiiffimminni nunaqqatitik immiussinnaalissagaluarpaat ajornanngitsumik annikitsumillu taperneqarsinnaalerunik.



Immiussisarfiaraatillit suliarfik inuussutissarsiutiginerulersinnaavaat, nipilersortartorpassuit saqqummersitsinissaminut periarfissagissaarnerulissapput.

“Kalaallit nuannarisaat” taamaallaat akilersinnaasutut saqqummersinneqarsinnaagallannerini, nutaalit eqqumiinnerit nunatta avataaniit soqutigineqarnerusinnaagaluartut akilersinnaanerusumik saqqummersinnaalissagaluarput.

Ersarissumilli oqaatigilara, ullutsinni immiussineq saqqummersitsinerlu aningaasarsiutaanngilaq. Saqqummersitsereernermili ilisimaneqalernerup kingorna tusarnaartitseqattaarnerit taamaallaat aningaasarsiutigineqartarlutik. Taamaallaalli ataasiakkaannguit nipilersorneq inuussutissarsiutigisinnaallugu.

Eqqaamassavarpulli cd-p piuneerukkiartuaarnera, pisiarineqassaariartuaarneralu. Ullumikkut cd-t pisiarineqartartut ikittuararsuupput, kopeerisartut amerlagamik, atortorissaarutillu qarasaasiat interneti streamerisarnerup downloaderisarnerullu ineriartupiloorneri ilutigalugu. Taamaattumillu akilersinnaasumik amigartoorfiunngitsumillu saqqummersitsinissaq ajornartupilussuulluni.

Aperisoqarsinnaavormi: “Soormi cd isumalluutigineqarsinnaajunnaarsimappat digitaliusumik saqqummersitsiinnarunik?”, ilumut, ullumikkut suli cd aningaasartuutitut matussusiisinnaasutuaagallarpoq. Erinaq streamigassanngorlugu Spotifymut ikkukkaanni, ataasiarluni tusarnaarneqarpat 0,04 centimik naleqassaaq, tassa 0,0004 dollars. Assigiinnarpaalu 0,003 kr. Immiussisimagaannilu 10.000 kr aningaasartuutugalugit, aatsaat 3 millioneriarlugu tusarnaqqaarneqartariaqarpoq Spotify isumalluutigalugu aningaasartuutit matussuserniassallugit. Immiussisimagaannilu 100.000 kr. Nalinganut, tassa immiussiviup attartorneranut, immiussisup akilerneqarneranut, saqqassaa, mixerneqarnera mastererneqarneralu ilanngullugit, aatsaat 33 millioneriarlugu tusarnaarneqarpat aningaasartuutit matussuserneqarsinnaalissapput.

Taamaammat nipilersortartut ilungersunartupilussuarmut inisseqqapput, pingaartumillu nunatsinni. Takuteqqiinnarpaalu annikitsumik tapiisinnaanissamut pisariaqartitsineq qanoq annertutiginersoq. Taamaaliornikkullu nipilersoriaatsit allat tusarsaavallaanngitsut aamma periarfissaqarnerulissagaluarput, massakkut tapeeriaatsip ilusilersugaanera pillugu, saqqummersitsiviit pioreersut akilersinnaasutut nalileeriaasiat pillugu, inuit 60.000-t ataallugit nunatsinni amerlassuseqarnerput pillugu, ilisarisatsinnik pisoqqasaalaannguanillu nuannarisaqarnerput pillugu.¹ Pingaartumillu nunarsuatsinni atuisuusugut nipilersukkanik tusarnaarnissamut akileerusukkunnaarsimanerput pillugu. Naak inuuneq naallugu sungiusarsimagaluarlutik, ukiorpassuit ingerlaneranni erinnat erinniaallutillu taalliaagaluartut, iluatsitsillutik namminerlu akileeqaallutik

¹ <https://da.uni.gl/media/259711/den-groenlandske-musikbranche-under-forandring.pdf>



immiussillutillu saqqummersitsisimagaluartut, atuisut taakku erinnat inuiaqatigiinnut “tunissutitut” isigilersimavaat.

Taamatullu nutaamik tapiissummik pilersitsinikkut sinerissami immiussisarfeerallit amerlasuut akilersinnaanerusumik suliaqarsinnaalissapput.

Siunissamilu allaat Kalaallit nunarsuarmi tusaamasarujussuit ingerlalluartullu aqcutissiuussinnaanngussavagut, takornariaqarnikkut, suliaasaqarnermut, akileraartarnikkullu iluaqutaalluartussamik, napatitseqataalersinnaasumillu. Eqqumiitsuliorneq aningaasartuutaannartut isigisinnaanngilarput, tassami utertittagaat annertunerungarmat. Nunanilu allani siuarsimalluartuni takussutissaavoq eqqumiitsuliornikkut nipilersornikkullu tapersersuineq annertulluinnartoq. Taassumalu kingunerivaa “musikindustri”, tassa nipilersornerup annertuumik inuiaqatigiinni suliffissaqartitsisutut, aningaasarsiorfittullu atuunnera.

Takorluuinnaarsinnaavarpummi taamak ikitsigaluta, ataasiakkaannguilluunniit nunarsuarmi milliardiusuni ilisimaneqalerunik imminnuinaq napatinnatik, nunatsinnullu aningaasanik aamma isaatitseqataalersinnaammata. Aalisagaq qaqikkuni tunigunilu tassa ataasiartumik aningaasarsissutigineqassaaq. Aamma ujaqqat allallu aatsitassat. Erinarli saqqummertoq qaqugumut piujuaannassaaq, qaqugumulluunniillu uteqattaarlugu tusarnaarneqartuassalluni. Erinniortorlu taalliorloq kuussuaavoq nungunngisaannartoq. Taakkuuppullu annertunerujussuarmik tapersersornerususassagut.

Annikitsumillu ajornanngitsumik tapiissummik pilersitsinikkut, assersuutigalugu 10.000kr-nik taperutsigit sumiiffimmini immiussisartuq saaffigissavaat, saqqummersitsinissarluk piviusunngortillugu. Uagullu pisortaniit tapeeqataasariaqarpugut akisussaaffimmik tiguseqataalluta, inuussutissarsiornekkut siuarsaataassammat, nipilersornikkullu siuarsaaqataassammat.

Ullumikkut kulturikkut inatsimmi, aningaasanullu inatsimmi taamatut ittumik tapiissummik soqanngilaq. Taamaammat kulturikkut inatsimmi inatsisitigut toqqammavilerlugu una aallartisarsinnaanngilaq. Kiisalu toqqammaviusumik finanslov aqcutigalugu inatsisiliortoqarsinnaanngimmat, Atassummiit isumaqarpugut taamatut misiliutaasumik misilittakkanillu katersiffiusumik aallartitsisoqarsinnaasoq, ataavartussamik pilersitsinissaq pitinnagu.

Aningaasatigut ingerlatsinikkullu pisortanut kingunerisassai:

Misiliutaasumik aningaasaliiffissatut aaqqiineq ukiuni marlunni katillugit 300.000 kr.-it aningaasartuutaassapput. Kiisalu aallartisarneqarnerani suliallu ingerlaarnerani allaffissornikkut ukiumut, AC Fuldmægtigep ukiup affaatut naleqartumik suliaqartinneqartassasoq naatsorsuutigineqassalluni, tassalu 500.000 kr.



Namminersortunut aningaasarsiornikkut allaffissornikkullu kingunerisassai:

Amerlanerit saqqummersitseqattaalernissaat siunniussaavoq. Ilaasalu saqqummersitsereernerup kingunerani tusarnaartitseqattaarsinnaalissapput, suliassaqartitsinermillu kinguneqarsinnaalluni. Siunertaavortaarlu sinerissami immiussisarfiutillit amerlanerusunik suliassaqarsinnaalernissaat.

Innuttaasunut aningaasarsiornikkut allaffissornikkullu kingunerisassai:

Soqanngilaq.